

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 20.9.2012 18.05 Uhr auf 94.0 bzw. 87,7

Leev Toehörers,

weer hett Kickers Emden knapp 'n Spöl in de Landesliga verloren. Dit Maal mit 2:3 tegen de SC Melle, ofwall de Mannskupp völ beter spölt hett, as een Week vörher tegen Hollage up egen Platz. All drie Toren full dör „Standardsituationen“, as man up hoogdüütsk seggt. Twee Freetrappen un een Elfmeter brochen Kickers Emden up de Verlesestraat. „Ik kann de Jungs nix försmieten. Se hebben goed spölt un rechtskapend Gas geven“, see Kickers Emdens Trainer **Yasin Turan** na dat Spöl.

Na dat verlorene Spöl in de lesd Week harr Turan de Achtermannskupp umbaut. So spölte **Ralf Ludwigs** up de rechte Kann, in Middent spölten **Gökay Batbay** un **Milad Faquryar**, links wurr **Manuel Menzel**, de sien Speer ofseten harr, insett. Man ok in 't Tor stunn dit maal neet **Rene Carstens**, sünnern **Karsten Buss**. Trainer Turan see, dat he mall wesseln muss, wall ok Karsten Buss 'n heel goed Torwart was un de eenfach maale dran was.

Torwart Buss harr sük sien Insatz seker ok anners vörstellt. Man an de drie Toren kunn he nix maken. All drie Toren för Melle skoot **Ustim Schröder**.

Anfangs harr Kickers in de Achtermannskupp noch Probleme, man de wurren mit de Tied immer minner. Kansen gaff dat dör **Carlos Santos da Luz** un dör **Thilko Boekhoff**, de 'n Freetrapp weer maale an de Posten knallte. Ohn Toren gung dat in de Halvtiedpaus. Man al 5 Menüten later gung dat Melle na 'n 25-Skoet in Föhren. Kickers spölte aber wieder goed mit. Un **Tobias Bruns** kunn in de 65. Menüte utglieken. Man 10 Menüten later wees Schiri **Henrik Frilling** ut Lohne up de Elfmeterpunkt, as Gökay Batbay een Spöler toe Fall broch. Schröder leet sük de Kans neet nehmen un skoot toe dat 2:1 in. Un kört drup skoot he dat darte Tor för Melle. Disse Tor harr de Schiri ansük neet geven dürt. Menzel spölte de Ball un sien Tegenspöler full over hum. Kört vör Schluss, in de 83. Menüte, harr de „Matchwinner“ Schröder sogaar noch sien veerte Tor maken kunnt, man sien Skoet prallte tegen de Latt. **Martin Habben**, de in de 73. Menüte inwesselt worden was, skoot in de 90. Menüte dat tweede Tor för Kickers Emden. Man dat Tor kwamm toe laat.

Mörge geiht dat in d' Oostfreesland-Stadion um Klock acht tegen Papenbörg. Ok hier kann man van 'n Derby proten. Hopentlik komen mehr Toekiekers as in de lesd Weken. De jung Kickersmannskupp hett dat verdeent.

So, nu as alltied, noch 'n kört Foetballwitz:

Fritzchen mutt na de Psychologe. De fraggt hum: „Na worum büst du denn hier?“ „Mien Mama hett seggt, ik sall na hör komen, wiel ik so leep geern Foetball mag!“ „Aber, mien Jung, dat is doch neet schlimm!“ „Na ja, ik mag hum an leevsten mit Spinaat un Kees!“

Leev Toehörers van Radio Oostfreesland,

dat was dat weer maale för disse Week,

ik hoop, Joe hett dat Plattdütsk gefallen, denn mien Motto heet ja alltied, plattdütsk dürt - netso as Kickers Emden – neet unnergahn.

Un dat segg ik elksmaale, man dit maale segg ik noch 'n bietje mehr. Septembermaand is Plattdütskmaand. Un ok draag dor 'n bietje bi. Wenn Ji, leev Toehörers, 'n plattdütske Vertellsel van mi hören muchen, dann wählen Se de Telefonnummer van de Vörlesetelefon 04941 (för Auerk) 69 99 44 an. Se könt dat rund um de Uhr daan.

Bit anner Maal
Joe
Erich Bolinius
ut Emden-Petjem.